

## Allaah Taa'alā Ne Ibraaheem<sup>(a.s)</sup> Se Ek Ahad Kiyā

**Taurait : K̄hilqat 17:1-14**

Jab Ibraaheem<sup>(a.s)</sup> ninnaanabe saal ke the to Allaah taa'alā ne unse kahā, "Maiñ har cheez par qudrat rakhtā huñ. Merā kahnā maano aur seedhe raaste par chalo. Agar tum aisā karoge to maiñ tumse ek ahad karuñgā."<sup>(1)</sup> Maiñ waadā kartā huñ ki tumse ek baqī qaum banaauñgā."<sup>(2)</sup> Ibraaheem<sup>(a.s)</sup> ne Allaah taa'alā ko sajdā kiyā. Allaah taa'alā ne Ibraaheem<sup>(a.s)</sup> se kahā,<sup>(3)</sup> "Ye hamaare beech hue ahad kā hissā hai, maiñ tumko bahut saare k̄ḥaandaanoñ kā buzurg banaauñgā."<sup>(4)</sup> Maiñ tumhaarā naam Abraam se badal kar Ibraaheem kar rahā huñ, jo is baat kī nishaanī hai ki tum un saare k̄ḥaandaanoñ ke buzurg hoge."<sup>(5)</sup> Tumhaarī nasleñ bahut hoñgī aur nae k̄ḥaandaan, baadshaah unheen nasloñ me se hoñge."<sup>(6)</sup> Ye ahad tumhaarī āne waalī pushtoñ ke liye bhī hogā aur ye hameshā chaltā rahegā. Maiñ tumhaarā aur tumhaarī āne waalī nasloñ kā bhī rab huñ."<sup>(7)</sup> Maiñ tumko aur tumhaarī nasloñ ko Kanaan mulk kī zameen duñgā, jismeñ tum safar kar rahe ho, aur ye zameen hameshā ke liye tumhaarī ho jaaegī."<sup>(8)</sup>

Allaah taa'alā ne Ibraaheem<sup>(a.s)</sup> se ye bhī kahā, "Tum aur tumhaarī har daur me āne waalī nasleñ jo tumhaare baad āeñgī, is ahad ko maaneñgī."<sup>(9)</sup> Hamaare, tumhaare, aur tumhaarī āne waalī nasloñ ke beech jo ahad huā hai uskī nishaanī ke liye har mard kī k̄ḥatnā karnī hogī."<sup>(10)</sup> Tum bhī hamaare beech hue is ahad kī nishaanī ke liye apnī k̄ḥatnā karaao."<sup>(11)</sup> Jab laḍkā āṭṭh din kā hogā to uskī k̄ḥatnā karaanā."<sup>(12)</sup> Har daur kā bacchā jo tumhaare k̄ḥaandaan me paidā huā ho yā kisī padesī se k̄ḥareedā ho."<sup>(12)</sup> Har laḍke kī k̄ḥatnā karnā zarurī hai, chaah wo tumhaare ghar maiñ paidā huā ho yā naukrī ke liye kisī se k̄ḥareedā ho. Hamaare beech hue is ahad kī nishaanī tumhaare jism par hameshā rahegī."<sup>(13)</sup> Har wo mard jiskī k̄ḥatnā naheen huī hogī usko k̄ḥaandaan se nikaal diyā jaaegā kyunki usne is ahad ko toḍā hai."<sup>(14)</sup>